

БАЙГАЛЬ ОРЧИН, НОГООН ХӨГЖИЛ, АЯЛАЛ ЖУУЛЧЛАЛЫН САЙД,
ЭРҮҮЛ МЭНД, СПОРТЫН САЙДЫН ХАМТАРСАН ТУШААЛ

2015 оны 10 дугаар
сарын 08 -ны өдөр

Дугаар А/356/396

Улаанбаатар хот

Химийн хорт болон аюултай бодисын
ангилал батлах тухай

Химийн хорт болон аюултай бодисын тухай хуулийн 4 дүгээр зүйлийн 4.2 хэсгийг үндэслэн ТУШААХ нь:

1. Химийн хорт болон аюултай бодисын ангиллыг 1 дүгээр, Химийн хорт болон аюултай бодисын ангиллыг ашиглах аргачлалыг 2 дугаар, Химийн хорт болон аюултай бодисын ангилалд хамруулсан бодисын жагсаалтыг 3 дугаар хавсралтын ёсоор тус тус баталсугай.


2. Энэ тушаал батлагдсантай холбогдуулан “Ангилал батлах тухай” Байгаль орчин, аялал жуулчлалын сайд, Эрүүл мэндийн сайдын 2009 оны 01 дүгээр сарын 05-ны өдрийн 04/04 дүгээр хамтарсан тушаалыг хүчингүй болсонд тооцсугай.

БАЙГАЛЬ ОРЧИН, НОГООН
ХӨГЖИЛ, АЯЛАЛ ЖУУЛЧЛАЛЫН
САЙД



Н.БАТЦЭРЭГ

ЭРҮҮЛ МЭНД, СПОРТЫН
САЙД



Г.ШИЙЛЭГДАМБА



Химийн хорт болон аюултай бодисын ангилал

Нэг. Нийтлэг үндэслэл

1.1. Химийн хорт болон аюултай бодисын тухай хуулийн 4.2 дахь заалтыг үндэслэн, Нэгдсэн үндэсний байгууллагаас боловсруулж гаргасан “Химийн бодисын ангилал, хаягжуулалтын нэгдсэн систем. 2013”-ийг ашиглан боловсруулсан энэхүү жагсаалтыг химийн хорт болон аюултай бодис, хольцыг ангилахад ашиглана.

1.2. Энэхүү жагсаалтын зорилго нь химийн бодисыг хүний эрүүл мэнд, байгаль орчинд үзүүлэх хор аюул болон физикийн аюулаар нь ангилж, ангилал тус бүрт тохирсон анхааруулах тэмдэг, дохио үг, аюулын тэмдэглэгээ хэрэглэх замаар химийн бодистой харьцаж ажилладаг ажиллагсадад тухайн бодисын хор аюулын талаарх товч, тодорхой, ойлгомжтой мэдээллийг өгөхөд оршино.

1.3. Химийн хорт болон аюултай бодисыг ангилалд хамруулахад “Химийн хорт болон аюултай бодисын ангиллыг ашиглах аргачлал”-ыг ашиглана.

1.4. Энэхүү ангилал нь химийн хорт болон аюултай бодисын зөвшөөрөл авах үндэслэл болохгүй.

Хоёр. Хамрах хүрээ

Химийн хорт болон аюултай бодисын ангилал нь:

- эмийн бодис,
- цацраг идэвхт бодис,
- хүнсний зориулалттай бодисоос бусад бүх төрлийн бодис, хольцод хамаарна.